

» BOTR 2015 berlangsung  
pertengahan November © Muka 16

Haidir dengan kertang 20kg yang berjaya dipancing di perairan Bintulu.

# 30 minit jinakkan kertang 20kg

» Hasil lubuk ikan di perairan Bintulu masih lumayan walaupun memancing ketika jerebu

Oleh Matzidi Dris  
mzidi@bh.com.my

◀ Kuala Lumpur

**M**embawa pulang tiga kerapu atau kertang masing-masing seberat 20 kilogram (kg), 12kg, 10kg dan 23 tenggiri bersaiz dua hingga tujuh kg, 10 ikan pecah periuk saiz sederhana, adalah kejayaan terbaru dua pemancing tegar dari Bintulu, Sarawak, pada hujung minggu lalu.

Semua ikan itu, diperoleh oleh Haidir Abidin, 35, dan rakannya Halim Sanai, 36, menggunakan kaedah pancing dasar, layang serta jigging.

Haidir dan Halim kerap memancing di tiga lubuk di perairan terabit iaitu lubuk Kapal Karam, Gopa Gora dan E8.

#### Tak hirau jerebu

Katanya, biarpun ketika itu masihlah jerebu tebal masih berlaku di perairan Bintulu, sekali gus menyebabkan jarak penglihatan terhad namun, tidak menghalang beliau keluar memancing.

Penolong Pegawai Pertanian di Universiti Putra Malaysia (UPM) Bintulu itu berkata, sejak lebih dua tahun lalu, hampir setiap hujung minggu beliau keluar memancing di perairan itu.

Setakat ini, sejak terbabit di

dalam aktiviti memancing di laut dalam pada tahun 1997, belum pernah beliau pulang dengan tangan kosong.

"Namun semua aktiviti itu akan dibatalkan, sekiranya ada tugas pejabat yang harus diselesaikan sepanjang dua hari itu atau menerima jemputan untuk majlis nikah kahwin atau urusan keluarga," kata Haidir.

Pada hujung minggu lalu, beliau + dan Halim memancing di tiga lubuk di perairan terabit kerana sekarang adalah musim tenggiri dan kertang.

Katanya, rugi kalau tidak ke laut memancing pada hujung minggu kerana ikan yang diperoleh bukan sahaja untuk dijadikan lauk makan bersama keluarga, saudara-mara atau kawan, malah ia juga boleh dijual.

Mereka mengambil trip dua hari semalam, berlepas dari Jeti Kampong Baru, Bintulu pada jam 6 pagi.

Jarak tiga lubuk yang mereka kunjungi kira-kira 30 kilometer dari Kuala Bintulu.

#### Jerebu tebal

Jarak penglihatan pada waktu itu memang terhad kerana jerebu tebal dan keadaan laut beralun setinggi 0.5 meter, namun ia tidak menghalang misi trip terbabit.

Haidir berkata, sejurus bot mereka menghampiri lubuk Kapal Karam, beliau melabuhkan joran menggunakan kaedah jigging dan selang lima minit, jorannya disentap kuat dan setelah dinaikkan rupanya seekor tenggiri seberat 3kg.

Katanya, selain jigging mereka menggunakan layang dan dasar menggunakan umpan ikan jamah, tamban dan alu-alu.

"Kira-kira pada jam 4 petang pada hari kedua, joran saya yang berumpukan ikan alu-alu hidup, disambar mangsa dan saya mengambil masa 30 minit untuk main tarik tali dengan ikan berkenaan."

"Setelah mangsa dinaikkan, saya berteriak, kerana terkejut melihat seekor kerapu atau kertang seberat 20kg menjadi milik saya," katanya.



Haidir (kiri) dan Halim bersama hasil tangkapan ketika memancing di perairan Bintulu.